

Kohima District TB Forum-DAPCC senden menogo



May 16 nü DC Conference Hall, Kohima nung Kohima District TB Forum-DAPCC senden amenba mapang tangokba noksa nung angur.

Dimapur, Monupii/May 16 (TYI): Kohima District TB Forum-DAPCC senden May 16 nü Deputy Commissioner Kumar Ramnikant, IAS lenisüba nung DC indang Conference Hall nung menogo. Senden nung TB tashidak kokteter alir kati National Tuberculosis Elimination Programme (NTEP) kübok tashidak anepaluba indang tajangshiba lemsatepa liasü. Paisa, mozü, treatment angati agütsüba aser temang anepaluba mapang senotsü teyari agütsüba atema kanga pelaba lemsatep. Pai, kecha tetsükdaktsü madokdaktsü ita trok mozü shidak chia treatment tembangtsü koda tongibang iba indang lemsatepba den külem TB agi shirangertem dang iba facility ya takok tashi agütsü

ajungshia liasü. Senden nungsa DTO Kohima, Dr. Chibenthung Kithan-i, district health unit inyakyim, NTEP kübok service balala agütsübatem den nükjidong aser tetsükdaktsü balala ajangshibatem indang lemsatepa liasü. Paisa, TB Mukh Panchayat kübok Kohima nung yimtsüng asem nungbo TB tashidak khenyongi makai akümba sangdonga liasü. DAPCU Kohima DPO, Sentimongla Tzudir-i, HIV prevalence rate, HIV dak sendakba facility tem, Kohima facility centers takok aser HIV dak sendakba nung tang district nung inyakyim balala benoka inyaka aliba indang metetdaktsü Kasa mapang nung DC Ramnikant-i, TB cases data bendentsüba dang masü saka

kanga junga asadangtsü nüngdakba lemsatepa liasü. Paisa, TB tashidak prokshia aoba nokdatsü atema tetendangba agütsü koda tongtibang aser iba den tashidak tendangba tesemtem nung awareness aser counseling agütsütsü nüngdakba lemsatepa liasü. Maneni senden nung Forum züngsemtemi TB dak sendakba nung nüburtem nem tangazükba agütsütsü atema hoardings aser creative display tem sayatsü asoshi Kohima Municipal Council dang mepeshitsü bangjema liasü. Senden nung tang Kohima district nung TB aser HIV tashidak den raratsü atema inyakyim balala benoka inyaka aliba indang onük dak rangloker sensaksema liasü.

Environment, Forests and Climate Change Dept-i metetdaktsür

Dimapur, Monupii/May 16 (TYO): Department of Environment, Forests and Climate Change-i sangdong ka ajanga, Department-i March 19 nü osang agütsüba nung temelenshi tera bener arua ,tate

sorkari tangalen nungi bener aruba kozü koba state ajanga aoeer iba dak sendakba nung Royalty Schedule Rates latettsüba indang metetdaktsüogoo. Iba tetuyuba ya osang agütsüba mapang nungi benoktsü aser Finance

Department, Budget & Monitoring Cell-ia jangja lir. 1. Areca Catechu (Edible) - Supari- 10 rupees per KG 2. Areca Catechu (Non Edible) -Supari (Lali)- 5 rupees per KG

RI Micro Planning & Vaccine Preventable Diseases Surveillance workshop agiogo



May 16 nü RI Micro Planning and Vaccine Preventable Diseases Surveillance dak sendakba nung workshop ka agiba mapang CMO Mokokchung, DPO (UIP & RCH) aser shisalen sayurtem den training nung shilem agirtem tangokba noksa nung angur.

Dimapur, Monupii/May 16 (TYO): Mokokchung District atema RI Micro Planning and Vaccine Preventable Diseases Surveillance workshop May 16 nü Chief Medical Officer, Mkokchung Conference Hall office nung agiogo. Vaccine agütsü atsiuyongba, Partially Vaccinated (Dropout) aser Zero dose children (Left

Out) aliba temulungdang yur, trainees tem nem tawa aliba jangjatsü, microplan tapet ka yanglutsü aser vaccine magi aliba tanurtem ajak jangja-a 100% vaccination atongtsü atema inyakyimtem sayua liasü. Trainees tem nemsä Vaccine Preventable Diseases (VPD) surveillance dak sendakba nung tangazükba agüja liasü.

Training nung shisalen sayurtemji Dr. Shiela Longkumer SMO (WHO) Kohima, Dr. Mhechekhro RRT (WHO) aser Dr. Pangjung SBCC (UNICEF) Kohima nung liasü. Training nung Medical Officers, CHOs, DPM, BPMs, DCM, BACs, EM (WHO) aser IEC personnel temi shilem agia liasü.

Dimapur Press Club-i asükhü lemsatep

Dimapur, Monupii/May 16 (TYO): May 15 nü Dimapur Press Club (DPC) züngsem Paudi Renta indang adianu Wikhuniu asüba osang angazüka DCP-i Renta aser par kinungertem den asükhü lemsatepogo.

Mangyim jashi tia nung aliba mapa Tsüngremi anisingzüik aser tashi agüjang ta onoki sarasademja atar. Asür tanüla teti tatem makadak anisingzüikdangiang ta sarasademja atar, ta kasa sangdong ajanga DCP-i lemsatep.

NBSE-i Class IX Science ebook indang metetdaktsü

Dimapur, Monupii/May 16 (TYO): Nagaland Board of School Education-i, NBSE kübok züngoksema aliba Institutions tekolak ajak dang digital content keter Class IX Science ebook angati agi kaketshirtem atema renemtsüba metetdaktsüogoo.

kümzüksü nükjidong nung yanglutsüogoo. Digital content ya topic/subtopic/experiment/examples aser exercises shia den play button keta aliba nung nema züngtettsü.

Digital content ajanga, kaketshirtem nem mashi mapang aser tesem nung aser kwiben amshiner amshitsüsa, ajak nem kasa aser jenjang aketba tangazükba asoshi maongka agütsür. Iba ajanga subject dak sendakba nung onüktem ajak digitally agütsür, koba tuton talila agiba nung rongsen intokba

Iba ebook atema linük ji <https://study.goyalsonline.com/NCERT-Science-Class-9-English-Medium/index.html> asütsü.

NBSE kübok züngoksema aliba Institutions tekolak ajak dang iba osang ya Class IX kaketshirtem ajak den lemsatepsü, aser iba facility ya takok tashi amshitsü atema kaketshirtem ajungshitsü mepeshia metetdaktsüogoo.

Human Rights dak sendakba nung awareness sentong agi

Dimapur, Monupii/May 16 (TYO): Human Rights aser Human Rights Commission shilem dak sendakba nung awareness sentong ka May 16 nü Ihoshe Kinnimi Hall Nagaland University, Lumami nung agiogo. Iba sentong ya Nagaland State Human Rights Commission aser Nagaland University na longjemer ayongzüka agia liasü.

kübok tekümzüka agüja aliba asadangshir. Iba dak alia NSHRC-i, meimchi temeden wadang nung bushisügang balala ajungkettsü atema jenjang agir.

Nagaland State Human Rights Commission (NSHRC) mendenbuba Justice. Songkhupchung Serto-i aiba team nung NSHRC Secretary aser züngsemtem densema liasü. Setong nung iba team yagi commission indang inyakyim tatongi metetdaktsü. NSHRC yagi meimchi temeden anema inyaksangshiba ken o tem okadak bangdaker aliba mapang court temelaba agir jenjang agir. Iba den meimchir temeden kümzüka ayutsü atema temzüng ozük

Maneni iba commission yagi meimchir temeden indang lokti nem temzüng ozük kübok iba temeden kümzüka ayutsü atema tekümzüka balala agütsür aliba indang tangazükba media aser tanga lenmang balala ajanga agütsür.

Sentong nungsa ken o ashishitsü atema tashi agüja aliba indanga sensaksema liasü.

Iba sentong nung department of Political Science nungi Prof. H. John Sema-i lokti pela agizükba o jembi aser Registrar Nagaland University Dr. Abemo-i tepela o jembia liasü.

Maneni Commission-isa, Government Primary School aser Health and Wellness Centre sendanga staff tem den sensaksema liasü.

Mokokchung DC-i "Dry Day" ayongzüka amungtsü ajungshia

Dimapur, Monupii/May 16 (TYO): May 16 nü 'National Dengue Day' amungba anogo Deputy Commissioner, Mokokchung, Thsuvisie Phoji-i, Mokokchung district kübok kibong ajak dang hopta shia "Dry Day" amungtsü ayongzüko.

mapang naro pot, tziü tadendak, pongdang tejen aser tyre amala nung tziü atsünga aliba, aser tziü bangdaker aliba tesem nungi tziü mesütoktsü aser merekteta amungtsü. Iba inyakyim ya merila entsü koa poktetba tesemtem samatsütsü asoshi lir aser iba ajanga dengue adokba nokdaktsü aser azüoktettsü.

Iba anogo ki temeket ajak merekteta amungtsü aser iba

Nagaland nung 74th... (TAPAK 1 NUNGI...)

1951 küm iba plebiscite ya ajanga Naga nung lungjemer Naga Sovereignty bhukuma vote shilem 99.9 agütsü aser alima dang asenok ajaki sovereignty aginüba sayuogo, ta pai ashi.

tasa amshiba nung asenok asür, aser iba tasa ajanga asenok tsüngta telemsa adoker, kati ka anema nokdaker, asen temulungtetba tashi maitba kumdaktsür aser asen tejangraba samadaktsür.

Asen otsüla-oboula nungeri tasü ita raraba mangdang aser tejangraba nung takok angütsü jenjang nung Naga nung ali asü masü, ta pai asüngdanga liasü.


Asenoki otsüla-oboula nung tsüngsü nung jaja tarutsü putu asoshi telungjem aser temeimtep lenmang lepboktsü asen mapa lir, ta paisa ashi.

"Tesüiba mapang Naga plebiscite agiba ajanga sovereignty asoshi arok tejangraba sayur. Iba sentong nung asen nübur teimla aser tejangraba liasü. Ajisüaka tanü tashi asenok tsüngta telemsa adoker telungjem maka mangmangteper," ta pai ashi. Dangari lemsar yimsü asütsü

Iba sentong nung NNC kilo kilonser Shevohü Keyho menden liasü, kong Associate Pastor, KABA Dr Imutoshi Lemtur-i sarasadem aser Chedema Thenuko Krotho aser Rengma Baptist Church Kohima ajanga temeja ken aten, aser NNC Advisor Dziesevilie Kesiezie-i melepzüng o jembia liasü.

MULUNG NEN O

10th Nov. 1925
to
06th May 2024



*"Ni rara tajungji
rarago, ni alizung
tonga asemogo,
ni tamangji yuogo"*

2 Timothy 4:7

Onoki teti akhumtsübu meima aliba Tsürabur **T. SHILUCHIBA JAMIR**, Ex. G.B, Changtongya Town, iba lima nung arishia küm 99 temoatsü manung jangratema lidaktsür kinungsü, jala 7, Jabaso 1, mezüng Semchir 19 & tanabuba Semchir 29 toktsür, kibubai lemzüksüba anogo 6th May 2024 arishi tempangba mapang kija, kibong, kinunger, medemer, temeimer, Arogo aser Lokti shirnokisa nübu, rongsen aser sarasadem agi yaritepogo, nenok ajak dang kanga pelaba lemsateper.

Onok mangyim jashi nung alidang nenoki yariba atema kangasa pelar aser nenok temeim ajanga onok mulung anisungzükdaktsüogo.

Item kija aser Loktitem dang alakteta pelaba metetdaktsür :

1. Dr. Talimoa , Zion Hospital, Dimapur	11. Medical Ward Yimden, CTN Town
2. Dr. Athikho, Zion Hospital, Dimapur	12. Medical Ward Youth Union, CTN Town
3. Doctor & Nurses of CHC Changtongya	13. Tetsür Telongjem, Medical Ward, CTN Town
4. Changtongya Town Baptist Arogo	14. Changtongya Mongkumjang Kidong
5. Kohima Ao Baptist Arogo	15. Mongkumjangtsür Telongjem, CTN Town
6. Nepali Baptist Church, CTN Town	16. Liroyim Village Council
7. Konyak Baptist Fellowship, CTN Town	17. Yaongyimsen Tetsür Telongjem, CTN Town
8. Changtongya Kosasanger Putu Menden	18. Counsellors, Yaongyimsen Arogo
9. Gaonbora Union, CTN Town	19. Changtongya Senso Telongjem, Kohima
10. Pensioner Union, CTN Town	20. Changtongya Students' union, Kohima

Nenok kija & kibong tenüng teta pelaba meshitetba asoshi sasar, saka tulusang Tsungremi nenok ajak molamoshia moajang ta onok sarasadem.

-Temeim Kinungsü, Chirnurtem, Semchirtem & Anük-apang.

June 4 sülen chuba chirtem bendangleni sodi oadoktsü: PM Modi

New Delhi, May 16 (Agencies): Brihostibarnü Ato kilonser Narendra Modi-i Congress lenir Rahul Gandhi aser Samajwadi Party Tir, Akhilesh Yadav na aija, June 4 nü Lok Sabha election sangdongba sülen chuba chirtemi linük toktsür bendangleni sodi oadoktsü, ta ashi.

Uttar Pradesh Lok Sabha election nung Congress party aser SP na lokteper tokteper, aser iba dak sendakba nung Modi-i lenir ana aija, "Chuba chirji Lucknow (Akhilesh Yadav) nungi süaka mesüra Delhi (Rahul Gandhi) nungi süaka parnoki kerakera summer vacation atema linük

toktsür oadoktsü," ta ashi.

Akhilesh aser Rahul na maneni aija Ato kilonseri, chuba chirtemji tamarener kidang aso, anungji parnoki mapa tasak meinyakba, ta ashi.

Uttar Pradesh kübok Pratapgarh nung election nüboyim sentong ka nung jembidang Modi-i, "Nenok tenzüksü atema ni amang-sangwa methitemi inyaktsü, ta ni nangzüker. Kü mapang ajak nenok asoshi bendanga agütsütsü," ta ashi.

Rahul Gandhi-i Amethi nungi masü Rai Bareli menden nungiang tokteptsü telemteba agiba dak sendakba nung Modi-

i, "Rae Bareli nung alirtemi pa kidangi meyipa yoktsü, ta pai metettsüla. Pai Amethi toktsü aser tang maneni pai Rae Bareli-a toktsütsü. Linük ketdangtsütsüji tamarener kibong nung asoba tanurtem atema masü," ta ashi.

2019 küm Lok Sabha election nung BJP candidate, Smriti Irani-i Rahul Gandhi madak takok ngua liasü. Iba jakdang Rahul asemben tashi Amethi nungi MP inyakogo.

Modi-i, "June 4 sülen aika ataloktsü. Oppostion INDIA teloktep loksatsü aser tamakok anguba atema parnok tsüngda tai tongloktsüteptsü," ta ashi.

Covaxin agir shilem 30 bo küm ka sülen temang nung timtem adok

New Delhi, Monupii/May 16 (Agencies): BHU nung research agirtemi study ka agiba ajanga, Bharat Biotech indang Covaxin vaccine agirtem shilem asemsü nungi shilem kasü (1/3rd) bo temang nung timtem adokogo ta bushitet.

India nung coronavirus wara tamajungba mapang nüburtem nem agidaktsü coronavirus vaccine rongnung Bharat Biotech indang Covaxin-a densema liasü.

Iba study nung shilem agir 926 liasü aser parnok rongnung shilem 30 dak temaibo 'adverse events of special interest,' (AESI) ajangshia liasü. Parnok

rongnung teimbaka viral upper respiratory tract infections agi timtem. Iba dak alia parnok rongnung shilem kabo stroke asü mesüra Guillain-Barre syndrome agi timtema liasü.

Iba study ya 2022 küm January ita nungi yaküm August ita tashi agi. Iba study nung Covaccine vaccine agir tainlonglong 635 aser tain 291-i shilem agi.

Kanga bulua timtemba AESI rongnung tainlonglong rogo aika teküp aser teküp telung nung timtem, tongtoret aser tezü nung timtem adok. Taintem rongnung shi-tetsü den tongtoret aser tezü nung timtem ajangshi.



May 16, 2024 nü Ranchi nung Jharkhand Minister, Alamgir Alam court kati anir aodang tangokba noksa nung angur. Alamgir Alam indang secretary Sanjeev Lal'er kidang sen aika apuba ken o dak sendakba nung Bodhbarnü ED-i Alamgir apu.

Tesüiba küm 10 nung official tashi tim mesüi amshi: Sharad Pawar

Mumbai/Nashik, May 16 (Agencies): Bodhbarnü Ato kilonser Narendra Modi-i Mumbai North East nung candidate, Mihir Kotecha atema nüboyimtsütsü asoshi Mumbai semdangba mapang nung kasa constituency nungji MVA candidate, Sanjay Dina Patil atema nüboyimtsüdang NCP (SP) Tir, Sharad Pawar-i Ato kilonser sashia aitsü.

Kanjurmarg East nung lokti senden nung jembidang Pawar-i, "Tesüiba küm 10 tsüngda Modi yimsütsüba mapang nung official tashi tim mesüi amshio," ta aitsü. Paisa, Modi aitsürtem ajak jail nung puok, ta ashi.

Dindori Lok Sabha constituency nunga nüboyimndang Pawar-i, vote angutsü nükjidong nung tamangba yimsü aser kin nung ajemdaker telemsa adokdaktsüba mezüngbuba Ato kilonserji Modi lir, ta aitsü.

Vani nung lokti senden ka nung jembidang Pawar-i, Ato kilonser ka nükjidongji loktiliba nung ajak longjema lidaktsütsü atema asütsüla, ajisüaka linük longjema lidaktsütsü melen Ato kilonser Modi-i iba amaji meinyaker; Lok Sabha election nung vote angutsü atema pai kin aser tamangba yimsü nung ajemdaker telemsa adokdaktsür, ta ashi.

Mumbai nung lokti den jembidang Pawar-i, tesüiba küm 10 tsüngda LPG cylinders jenjang anaben agi tali kümogo, ta ashi.

2019 küm Lok Sabha election nung Modi-i tetsürtem dang cylinders nem salem agüjang ta jembia liasü, ajisüaka gas cylinders, petrol aser diesel jenjang atuba ya BJP sorkar tai ajanga lir, ta Sharad Pawar-isa metetdaktsü.

"Linük nung lanur aika kodamesüi lir aser mapa mangur. Parnok nem mapa agütsütsü melen BJP-i yangi (Maharashtra) aliba factories aser industries Gujarat tashi belener aoer," ta pai ashi.

Pai Gujarat sorkar dang, nenoki Maharashtra nung aliba factories belener maotsüla saka peisasa factories amenoktsüla, ta ashi.

Kasa senden nungji UBT Sena nungi MP, Sanjay Raut-i, "Asenoki democracy kümzüki süra ajaki iba Kamalabai (BJP) ya old-age home-i yoktsüla," ta ashi.

Paisa, "BJP ya ajak atema tsükchir, ibayongji onoki milen amtsü telemteba agiogo. Ajaki Maharashtra nung iba tongbang ya Sharad Pawar, Uddhav Thackeray aser Rahul Gandhi nunger lenisüba nung raner. Mumbai ya asür Balasaheb Thackeray-i yangerteta liasü, anungji Modi süaka Amit Shah süaka Mumbai-i aruaka onoki milen dang amtsü lemtetogo," ta ashi.

Modi aija Raut-i, "Pa indang tashiji ED aser CBI dang lir. Asenoki democracy kümzüki süra Sanjay Dina Patil nem vote agütsütsüla," ta ashi.



May 16, 2024 nü Poonch district nung PDP Tir Mehbooba Mufti'er jala, Iltija Mufti-i tetsü aser Anantpur-Rajouri constituency nung candidate, Mufti atema nüboyimtsüdang tangokba noksa nung angur.



TIR YIMYIM YIMOBILEM (EDITORIAL)

DIMAPUR ROGONÜ, MAY (MONUPII) 17, 2024

Tetsürtem mapang arur

Nagaland nung Municipal aser Town Council-tem nung tetsürtem nema menden karbo balaka shiteta yutsütsü atema talangka atsütepa arur, taküm 2024 küm nungi Nagaland nunga noklang nung shilem 33 tetsürtem asoshi balaka shiteta toktsür Urban Local Bodies (ULB) election agitsü sentong metetdakja lir. Tetezü, tang nungibo Nagaland nunga Municipal aser Town Council shia nung tebur ana shia tetsür kaka alitsü. Atangji, tetsürtem asoshi Municipal aser Town Council shia menden asem nung ka shiteta yutsüaka, ano tanüngba menden ana nungjia tetsürtem tokteptsü koka lir, anungji ULB kar nungbo teburtem dang nungibo tetsürtemang teimba asütsüsa ataloktsüa akok. Iba amaji atalokra asen lima asoshi temelenshi tulu aser tajung asütsü. Alima loktiliba nung tetsür asüyonga, tebur asüyonga temetetba aser tangatetba agi dang shisa tenük lapoker aser yimten aser lokti nung shilem agitsü koka akümer. Aji oda, asenok akhi tsürabur mapangbo tazüng temetetba mali, mapa ajak agi alui aotsü aser tebur nokinketeritem mapaji tsükchir kolak bushia aleptsü ta asüba putu nung asenok tebur mapaji tsükchirtem ket nungi tetsür tanurtem kümzüka ayutsübaji liasü. Iba jagi tagitsüa aser khureta tebur meyong aküm. Aji oda, yimten yimlijia tebur meyong kümer teburtemi latetba temzüng ozüng nungang tetsürtem anidakdakja aru. Atangji, tanüa akhi tsürabur mapang nungi shi agi alanga yimsüsüa aruba putu menden nungbo tetsür maitdaktsür, anungji ULB dak alaka yimtak yimtsüngtem nungbo tanga yimten yimsüsüba nung tetsür shilem malir. Ajisüaka, tanü asüngbo nübertem asoshi tagitarutsü mapatem teimbaka yimtak putu yimsüsürtem kübok masü saka state government kübok inyaker. Iba jagi yimten mapa nung süli mesüra terenlok mapatem nung süli tetsür tebur kecha tebandang mali, shiba temetetba aser shibaiang mapa akoker, pa mesüra la nemji inyakdaktsür. Ajisüaka, asen sobaliba nung tagitsüa aser sentsüa teburtemi dang senmang amanger asünungji, tetsürtem yabo yimten aser lokti nung züngoka maru. Aji agi, tetsürtembo yimten aser lokti nung shilem agitsüabajibo yutsür, sendenia marudaktsü aser asen lima nung kaketrejua tenzüka aodanga kibong aika nung tetsürtembo tangar kiyii orr tangar akümtsü ta bilema kaketshidaki meyok. Tetsürtem ajemrepa yutsübaji iba mapa aser tangatetba ajanga liasü. Ajisüaka, tanü putu nungbo yimtak yimtsüngtem nung yimsüsüba putu menden dang nungibo town nung Municipal aser Town Council dakang terenlok mapa inyaktsü tashi tuluba keta aküm nungji, akhi tsürabur sobaliba temzüng ozüng, sobaliru aser libaliru agi ULBs amokbangtsü makoker. Ibayongji, tanübo Nagaland nunga yimtsüngtem asoshi Village Council Act aser town-tem asoshi Municipal Act ta balala lateta lir. Iba temzüng kübok yimtsüngtema aser ULB-tema yimsüsürtemi pei teinyaktsü meteta pei lima aser nübertem tenzüksüla. Aji oda, Nagaland state tenzüker külena teburtemiang yimten yimli ajak amokbanger yimsü süa aruba, tangang Nagaland Legislative Assembly nung tetsür ana mentetogo aser ULB election agir sülen Municipal aser Town Council-tem nung tetsürtemi shilem agiba angutsü. Atangji, alima aser nübertem asoshibo tetsür tebur ta mali, shibai ochishia pei nübor tenzüker aser shibai nübertem atema mapa koka inyaker, pa mesüra laji dang nüngdaker. Tang tashi nung ochimashi aser tashiyim agi Nagaland raksaba ya teburtemi raksa, anungji tetsürtem arubaji teburtemi raksaba lima, yimten aser lokti yanglushitsütsü asoshi arur amai bilemer. Odanga nisunger yimya nung teburtem dang nungibo tetsürtem ochi tashiba aser tenendakba, anungji yimten nung Nagatsürtem shilem agiba ajanga teburtemi inyaka aliba ochimashi mapatem tesadangbo kenyongi ajemtsü imlar. Nagatsürtem asoshi tanü tayongzükba aser nübertemi imlaba o ji aji asütsü.


OLEMSABANG

LATE SUBONGNUKLU TAKÜM OTSÜ

- Mrs. Meyisongla, Rtd. Deputy Director, Nursing Kohima.

(Yashi adok nungi...)

Ao Milen zulur T.Senkai oko, Kodasür nai yamai jangra Ao Milen osang kaket adok? Ta asüngdang nong Okola Subongnuklu-i yamai langzü. Ni Dacca nong azüngdag Bengali osang kaket nong yamai zuluba ni züngshi. India ajak nong kulemi tejakleni aotsü, anima alitsü, merakmejua alitsü, mapa meranga inyaktsü aser kaket shisatsü nong tangar meneba renloktsü indang zuluba azüngdang kü molung nong kanga kongshi aser ni ajongshimeso, ni kanga jangradaktsü. Ni bilem Aor/Naganunger kodangang yamai osang kaket atoka nübertem nem osangtsüsang prokshitsü ta belem.



Itemji angashia ni kanga süngmanga temoatsü angu. Okola Subongnuklu-i anguba aser metetba shisatsüji pa atema dang masü teimtem terokong jenti arema pa nüksü agi asen Aortem atema nüngomapa aika inyaktena doktsü pa keja tashi agi purmedemer tsüngda, Arogo, Government aser lokti ajak kanga tasü ita aser tashi ita inyakogoni. Item dak alaka

- * Pai Kohima Arogo 1939 kum church asü
- * Chairman Ao Senden Conference mezüngpuba
- * Ao Tribal Council 1945-1953
- * NNC member
- * Mokokchung nong mezüng news paper regular süa agir
- * Imkongmeren tena liasü.

Langpangkong Tsükong Telongjem (Unit)

No. 3: Langpangkong Tzükong Telongjem meeting nong yamai lemteti:-

Mendenpurtemji yamai

1. Chairman – Mr. Arshingang – Chuchuyimlang
2. Secretary – Mr. Pongenmeren – Merangkong

Membertem

3. Mr. Limaangzük – Mongsenyimti
4. Mr. Repalemba – Akhoya
5. Mr. Takajungba – Merangkong

Parnoki yamai lemtet. Iba telongjem dang Langpangkong Telongjem ta ajatsü

Nükjidong:- Lemang aser apu (Road and Bridges) Amguri nongi Mokokchung tashi cari lemang lapoktsü. Tamasa Mongsenyimti yim nongi Anaki tashi lemang lapoktsü. Iba lemang yagi koba yimse ajangdir par yimer jagi pei chiyongtsü aser sungo yi bener angati nüboagi aremji achitsü ta renem.

Mr. Subongnuklu overseer,
Mr. Repalemba – Mohorier

Tena Mongsenyimti yimdak lia iba mapa repringtsü ta lemteta. Iba mapa atema Subongnuklu Earn leave agir pa angati nübo agi Amguri nongi Mokokchung tashi mile 53 Mr. Repalemba Mohorier aser Mr. Takajungba merang par asem yaritepa, Ao-o (bamboo) nong sorochioka chiyonga süngo yi pei sasa bener arem mong pangchi per (snakes) merila aser pezünu agi metep arema, ita ana asem arem nong mejanga alignment yanglu. Item mapa tajung ngua Assam Chief Engineerbai Amguri lemang tutsü Naga nunger ajak yimtsüng balala lemsar alem. Lemang Amgui nongi Mokokchung tashi jeep bo tutettsüsa lemangji tutsü ibai 1948-1949 kum liasü (53 kilometer) ya asangsang tanü asenok jangratema senzür.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Latin America tesem ajaklen Khristanem reshikangshir



Nicaragua nung Khristan putir, Rolando Alvarez apuba anema San Jose Tenla kima Khristanemi longkak aitdang tangokba noksa nung angur.

May 16, 2024: Latin America tesem ajaklen communist sorkartem, temesepba mozü shibelenertem aser raraba hadir abenba telok balalai Khristanem reshikangshiba kanga bulua kümogo, ta International Christian Concern (ICC)-i metetdaksü.

Talisa Cuba, Haiti, Mexico aser Nicaragua linüktem nung Khristan meyirjang aika amokmerena reshikangshir, ta ICC-isa metetdaksü.

Cuba nung communist yimsüsüba kübok yimsü dak sendakba reju ajak azüoker aser Office of Religious Affairs (ORA) nung register asütsü tuyur.

Register süa aliba organization nung madenertembi ozüing alema inyakertem ama züngshia amokmerener mesüra pua ayur.

Cuba sorkari Khristan rejutem aika sorkar atema amokmeren ama bilemer, kechiyong sorkari meimchir temeden anema inyakba anema Khristanemi ola adoker. Ibayongji Khristan Arogotem nem license magütsür mesüra Tenla kitem shibangtsür.

United States Commission on International Religious Freedom (USCIRF) 2024 report ajanga ashiba agi, Cuba nung ozüing tasen ka ajanga yimsü dak sendakba mita repringertem anema inyaktsü temelaba agüja lir.

USCIRF report ajanga ashiba agi, "2023 küm May ita nung Cuba sorkari Social Communication Law agizüka liasü. Iba ozüing kübok yimsü dak sendakba nung sorkar aija jembitsü memelar."

Yamaji Nicaragua nunga Tir Daniel Ortega leniba kübok communist sorkari sorkar anema jembirtem anema inyaker. Catholic putirtemi sorkar anema jembiba ajanga sorkari parnok anema inyaker."

USCIRF-isa, , "2023 küm December 26 nungi December 31 tashi nung Nicaragua sorkari Khristan lenirtem aika puogo, talisa linük nung yimsü temedem aser meimchir temeden jenjang majungba indang jembirtem aika puogo," ta metetdaksü.

Nicaragua linük tesem ajaklen Evangelical Khristanem kanga amokmerener aser reshikangshir.

Tesüiba küm ana tsüingda Daniel Ortega-i aniba sorkari melungtet telok 3,500 dak tema anentsüogo aser item melungtet telok rongnung Khristan melungtet telok 342 densema lir.

Khristan melungtet telok 342 nungjagi Evangelical melungtet telok 256 aser Catholic melungtet telok 43 densema lir.

Evangelical associations indang melungtet telok teimbaka (183) 2022 küm anenja liasü.

Never Again co-ordinator, Wendy Flores-i, "Nicaragua nung Arogo reshikangshir, ajisüaka evangelicals ola madoki reshikangshir, kechiyong evangelical lenirtem kari sorkar pusemer aser aikati sorkar tsübuba agi sorkar anema ola madoker," ta metetdaksü.

"Sorkari tanem-tanemi evangelical associations aika anentsüogo. License magütsür aser bendanglen nungi senotsü agizüksü memelar. Sorkarisa Khristan melungtet teloktem indang bank accounts shibangtsür aser parnok meyong kiojen agiadoker," ta pai metetdaksü.

Reshikangshi aser amokmeren liaka Khristan melungtet teloktemi maneni mission mapa inyaker aser yimti aika nung tekülem sentongtem agir.

Nicaragua nung 2019 küm nungi 2023 küm tashi nung sorkari Catholic Arogo anema inyakba tatalokba 1,200 liasü. Iba mapang nungji linük nungi nun aser putir aika linük meindok aser putir 12 pua küm 8 nungi 30 tashi tepuokdak ayutsü obendang agüja liasü.

Mexico aser Haiti nunga Khristanem reshikangshi kanga bulua kümogo, talisa temesepba mozü shibelenertem aser prangpong amer telok balalai Khristanem anema inyaker.

Mexico nung Khristanemi ozüing alema temesepba mozü shibelenertem anema ola adokba agi parnoki Khristanem anema inyaker.

Mexico nung sorkar dang nungibo mozü shibelenertem tashi tuluba kümdar, aser ibaji ajanga Khristanem atema tensa tamajungba dang akümtsü.

Haiti nunga prangpong amer telok balalai ketdangsertem atsüingdokba ajanga Khristanemi sademsadema tekülem magiteter aser telok balala tsüingda rara nung Khristanem kanga takok angur.

Cuba, Haiti, Mexico aser Nicaragua linüktem nung communist sorkar aser ozüing alema inyaker telok balala tashi tuluba dang akümer, anungji Khristanem anema inyakba kanga renloktsüa akok, ta International Christian Concern-isa metetdaksü.

Tan ita tetenzüklen USCIRF-i U.S. State Department dang tamangba yimsü temeden anema inyakba atema linük 17 Countries of Particular Concern (CPC) nung züngoktsü atema benokba linüktem rongnung Cuba aser Nicaragua linük nata densema lir.

ANOGO ABEN TSÜNGREM DEN

Kidang sayuba mapa

- Tazüing 6:4-9

Senso ka küma indaktsütsüba mapaji tepenja aser mapang talangka agia inyaktsüba mapa lir. Tsüngremi asenok nem inyakyim tejangja kar agüja lir ta asenoki bilemtettsüla. Iba inyakyimji Tsüngrem tsübuba Khristan kibong nung shidak inyaker.

Shingaia Pa memetetba sayutsü makok. Anungji Laishiba nung ozüingtem, ainkartemi jembiba aser inyakyim sayua alibaji tsüraburi tekolok aser temulungjang nung zünga ayutsüla.

Ano, ochi temetetbaji ochi shia amshitsüla. Tesayuba tajung nung tangatetba aser taküm tatishitsü anaprongla dena lir.

Ano Tsüngrem ochiba koba kibong nem agütsü iba jagi mulungsentsü aser taküm libaliro anaprongla azüokdaksütsü mesüra kija ser telok tesendaktep anaprongla nung sayutsüla.

Au, kidang tesayuba tajung agütsütsübaji mapa tasak aser tayongzükba mapa ka lir. Aji asünung asenoki ibaji kümdanga inyaktsüla.

Item ya shisadangang: Tawa tanü kibong nung tebilemtsü timtem lir ta nai amanger asü? Yamaji lira, kechi inyaktsü akok? Nai kechi inyaktsü akok? Nai kechi inyaker ?

Sarasadem: O Kibuba, Ne telatet ozüing kü dang sayuangma; aser aji ni tatem tashi beshitsü.

Tenangzükba: Kibuba tajung aser tindang lir: anungji Pai temenen pur dang lemanng sayur.

DRC kübok Ituri province nung ADF teloki Khristan 11 tepset

May 16, 2024: May 13, 2024 aonung 8:00 ako meta Democratic Republic of Congo (DRC) nung Allied Democratic Forces (ADF) kiralongrartem Ituri province kübok Ndimoyim amakdang Khristan 13 tepset aser aika puer ao, ta International Christian Concern-i metetdaksü.

"Bandavilemba area nung ADF Administrator arua aliba mapang ka nung Islamic kiralongrar telok jagi Khristanem amak," ta Ndimoyim dak alir kati International Christian Concern (ICC) staff ka nem metetdaksü.

"Administrator-i iba tesem semdangba ajanga ADF kiralongrartem iba area amak asütsüa akok. Nüburtem tsübudaktsütsü aser tensa raksatsütsü nükjidong nung parnoki amak asütsüa akok," ta paisa metetdaksü.

Lendong nungi jenbur kati, ADF kiralongrartem jagi ki-a aika rongdoktsüogo aser tai maket nisung aika rongseta südaktsü, ta metetdaksü.

Tang Ndimoyim dak kibong pongubo mangyimdar; iba tatalokba ajanga Khristanem kanga aoksaogo aser tsübuteper, ta paisa metetdaksü.

Beni nung Khristan putir kati

iba tatalokba aitsüba den külemi nüburtem dang kanga kümküma alitsü aser ainertem mita repringtsü metetdaksü.

Khristan putiri, "Item kiralongrartem mapa ajanga meimchir ka taküm aser akhümket mezüngshiba sayur. Tai maket nüburtem kümzüksü atema security ahangshitsü aser kiralongra anema mapatong tashi itshitsü rongdak nüngdaka kümogo," ta metetdaksü.

Taoba ita April 11 nüa Beni anasa ADF-i yim ka amakdang Khristan tenet tepseta liasü. DRC ya Khristan nütsüing teimba aliba linük ka lir, ajisüaka linük anüdoklen tsütsü Islamic telok 100 dak temai mapang shia Khristanem amaker.

2018 küm ADF-i Islamic State telok den tesendaktep yanglua liasü. Parnoki region nung Sharia ozüing benoktsü meranger. Parnoki Khristanem puer aoer aser Islam yimsü agizüksü memelungertem tepseter.

ICC regional director for Africa-i, "ADF ya alima nung jihad rara nükjidong nung tentetba kiralongrar telok ka lir. ADF kiralongrartem DRC tesem ajaklen Khristan yimtsüingtem amaker," ta metetdaksü.

**AO OSHI ANGAZÜKDAK:
TANÜ ANGAZÜKTSÜBA OJANG**



Süngsem

(n) süngolio agi ali yangbanga meya atuba tesem (bushes)

* Süngsem nung shirurutem chiyongtsü angur.

Süngsembok

(n) Süngsem agi aküm agütsüba tesem (a place under thick cluster of leaves)

* Arem nung shirurutem süngsembok nung anisüngzüker.

OLONG PAITEP # 6789

Grid for OLONG PAITEP # 6789 with numbered starting points 1 through 17.

TIPLÉN

- 1. Nisung jenti - (5)
4. Tsük rudenba - (5)
6. Temzüng tesashi - (5)
8. S_ _ _ i - (3)
9. Nisung rongnung telemsa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong tatembangliba - (5)
17. Meputep - (5)

LANGTSÜNGLEN

- 1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Kenyongi majinü - (5)
13. Rong kanga tulu - (5)

OLONG PAITEP # 6788 TELANGZÜBA

TIPLÉN :

- 1. Tanga, 6. Wara, 7. Rajang,
9. Anük, 10. Jenjang,
11. Alar, 14. Ngashi, 15. Nala,
16. Mechi.

LANGTSÜNGLEN :

- 2. Anga, 3. Yabang, 4. Tarok,
5. Orak, 8. Ainer, 9. Anema,
10. Jabili, 11. Among, 12. Miim,
13. Anem.

KHEN SHISADANGDI

KHRISTANPUR TIM ATEMBA

Oba na tanü Hajara aoba agi school fee agüjangma no?

- Tebu - Masü ABAM aser Arogo Mission empelope saru agütsütsü ati
Tanur - Süra ni school-i moli no
Tebu - Nogma Mission-ji mamangertem mesütsü atema, aji asenok tamangertemi shilem agitsüla
Tanur - süra tanü nungi Nia Khristan yimsü ya mamangli, aji süra ni-a tamangertem nungi teyari angutsü
Tebu - Na Khristan kibong nungi, yamaji tesüma.
Tanur - Süra kechiba Khristanpur makamait kibong jenti lir to itemjibo merepranger

~ I.jr

BJP-i menden 400 kokra PoK India den longjemtsü: Assam CM

Guwahati, Monupii/May 16 (Agencies): Bodhbarnü Jharkhand kübok Ramgarh nung rally ka nung o jembiba mapang Assam Chief Minister Himanta Biswa-i, Lok Sabha elections nung BJP-i menden 400 kokra Pakistan-Occupied Kashmir (PoK) India den longjemtsü, ta ashi.

Sarma-i ashiba agi, iba ya party sentong ka lir. "Onoki menden 300 akokba mapang Article 370 aginogo aser Ayodhya temple yangluogo. Onoki menden 400 dak tem akokba sülen Pakistan-

Occupied Kashmir India den longjemtsü," ta Sarma-i ashi. "Menden 400 akokba sülenang shidakba inyakyimji tenzüksü. Taoba anogo ishika Pakistan-occupied Kashmir nung nüjiso atema yimyim ayimdar. Menden 400 adenba tetezü PoK India dangi meyipa arutsü," ta pai shisem.

"PoK nung ajaklen longkak aitar aser nüburtemi India wako bener Pakistan anema longkak aiter," ta Assam Chief Minister-i ashi. Sarma-i ashiba agi, Congress yimsüsüba mapang

Pakistan-occupied Kashmir dak sendakba nung Parliament nung kecha sensak mesemi liasü.

"Congress-i sorkar kümteter aliba mapang Kashmir ka India nung aser ka Pakistan nung lir ta ashi. Pakistan-i Kashmir atsüngba indang parliament nung kodanga sensak masem. Shitakbabo iba ya asenok meyong lir," ta pai ashi.

Maneni Assam Chief Minister-isa, Aurangzeb aser Babar (Mughal lenir) nati India anema inyakba Ayodhya nung Ram temple amenokba sülen tajemba kümdaktsüogo.

Mapa nung nisung tali aniokba ajanga GHADC rongsenketzüng nung timtem adoker: Meghalaya CM

Shillong, Monupii/May 16 (Agencies): Chief Minister Conrad Sangma-i ashiba agi, Meghalaya nung Garo Hills Autonomous District Council (GHADC) aser Jaintia Hills Autonomous District Council (JHADC) na dang rongsenketzüng nung tetsükdaktsü adokdar.

Rongsenketzüng nung tesüdaktsü adoba ya tazüokba kecha makai sorkar mapa nung nüburtem aniokba ajanga lir, ta pai ashi.

District council asem tekolak den sensaksemba mapang Sangma-i, KHADC nungbo iba timtema ya adoka mali, ta ashi.

Paisa, "GHADC kübok 2015-16 nung mapa inyaker 2,500 shi liasü aser KHADC nung tang mapa inyaker 800 dak tajemba lir. Sanctions, inyakyim mesüra recruitment systems tejangja makai yimden yimsüsüba tsütsü ajangzüksü atema rangloker tazüokba kecha makai mapa nungi nisung anioker," ta ashi.

Sangma-isa, GHADC indang forest department nung employee 450 lir aser JHADC indang education department staff 300 lir.

Paisa, tazüokba kecha makai mapa nung nisung aniokba ajanga district council tem nem

khuret agütsür. Chief Minister-i ashiba agi, pai tensa kanga junga asadangdar aser taoba küm pongu trok tsüngda GHADC nung nisung tasen ka danga maniok.

Pai, item employee tem kodang mapa nungi anendir, parnok indang mapa yagi non-sanctioned post tem nung shimmer alirtem yoker, ta ashi.

Iba inyakyim ajanga employee 2,500 aliba nungi 1,500 dak tajemba kümogo. Sangma-isa, district council kar nungbo service rules mali mesüra service rules kanga tejen kümogo, ta ashi.

Hopta ka tsüngda Mizoram-i Bangladesh nungi refugee 120 dak tema ait

Aizawl, Monupii/May 16 (Agencies): Bangladesh aser Myanmar nung mepetmesü adokba sülen Mizoram-i refugee tem aika senoka aitar.

Iba hopta kija Bangladesh nungi Kuki-Chin nunger 127 jena aruogo. Kuki-Chin National Army (KNA) anema Bangladesh military-i jenjang tesashi agiba sülen nüburtem jenshidar. KNA ya state balaka meshia nokdakba telok ka lir.

KNA ya 2017 küm tentet kong Bawm kin timba lir, shirnok Mizoram nung Mizo nunger den sendaktepa lir.

Refugee tem ya Lawngtlai district nung Bangladesh den arrtsü nung aliba Chamdur 'P' yimtsüngi aita liasü.

Tang refugee tem aitba densema 2022 küm November ita nungi tang tashi nung Bangladesh kübok Chittagong Hills Tracts (CHT) nungi refugee 1368 Mizoram-i jena aruogo.

Iba den bendenloksema Myanmar kübok Chin state nungi nisung 95 shi tang Mizoram kübok Lawngtlai aser Khawzawl district tem nung April tatemlen aser May

tetenzüklen nungi jenoka lir. Myanmar nung military aser Arakan Army na raratepba ajanga parnok jenshia aotsüsa aküm.

Mizoram sorkari refugee ajak nem teyari agütsütsü tenangzüka agütsüogo.

Mizoram nung tang Myanmar nungi refugee 34,000 dak tema jenoka lir. Parnok tesadang kabo kinunger kidang mesüra taa agütsür lidar aser tanungba nisung 16,445 ya districts tenet kübok relief camp balala nung jenoka lir.



Guwahati: Barpeta district kübok Kayakuchi anasa Bamunbari tesem nung lokti ana (Hindu aser Muslim) tsüngda mangatettep adokba sülen nisung aika yirur mozükidangi anirogo. Chief Minister Himanta Biswa Sarma tetuyuba nung PHE minister Jayanta Mallah Baruah-i Bodhbarnü Bamunbari semdanga tensa asadangogo. Paisa, Barpeta nung Fakhruddin Ali Ahmed Medical College and Hospital semdanga yirur alirtem den ajurutepa liasü.

T20 rankings: India nunger rongnungi Pandya temaba jenjang nung lir

Monupii/May 16, 2024
(Agencies): ICC T20 all-rounders list nung Sri Lanka nunger spinner Wanindu Hasaranga-i Bangladesh nunger asayar Shakib al Hasan menepa tena temaba jenjang nung lir aser kasa mapang nung India nunger asayartem rongnungi Hardik Pandya maneni temaba jenjang nung lir. Pa tang 7buba nung lir.

Pandya-i point 185 ngua pa tenetbuba nung Australia nunger asayar Marcus Stoinis point ka agi memenepi lir. Hasaranga-i point 228 nguteta Shakib den külemi temaba jenjang nung lir.

Afghanistan nunger asayar Mohammad Nabi (218) aser Zimbabwe nunger Sikander Raza (210) na tanabuba aser tasembuba jenjang nung lir.

South Africa nunger asayar Aiden Markram (205) pongububa nung lir.

Kasa mapang nung batter tem rongnung India nunger asayar Suryakumar Yadav-i point 861 nguteta pa maneni temaba jenjang nung lir. Pa sülen England nunger asayar Phil Salt lir aser pai point 802 ngua lir.

Batter tem rongnung Babar Azam (761), Aiden Markram (755), aser Mohammed Rizwan

(781) nungeri top 5 abensar. India nunger lanur asayar Yashaswi Jaiswal-ia point 714 nguteta iba list nung pa trokbuba nung lir.

Maneni T20 bowlers' ranking chart nung England nunger spinner Adil Rashid-i point 726 ngua pa temaba jenjang nung lir. Pa sülen West Indies nunger asayar Akeal Hosein (664) tanabuba aser tasembuba nung Hasaranga (687) lir.

Bowler tem rongnung India nungr bowler Axar Patel (660) pezübuba nung lir aser Sri Lanka nunger asayar Maheesh Theekshana (659) pongububa nung lir.

Sunil Chhetri international football asaya nungi anentsü



Monupii/May 16, 2024
(Agencies): India nunger nungtuugu football asayar Sunil Chhetri-i Bresthostibarnü pa June 6 nü Kuwait den FIFA World Cup qualification asaya asayaba sülen international football asaya nungi anentsü telemtetba agiba sangdongogo.

National team captain yagi iba telemtetba agiba ya social media nung video osang ka ajanga sangdonga liasü.

Arishi küm 39 tain asayar ya 2005 küm June 12 nü Pakistan den mezüngbuba India team nungi asaya-a liasü aser kasa asaya nung pai India atema mezüngbuba goal idaktsü.

"Ni belematokba masü mesüra kecha bilemloka maorer. Iba asaya ya tatembangbuba asütsüla ta bilema aru anungji ni mapang talangka bilemogo aser tang iba telemtetba agiogo," ta pai ashi.

Chhetri ya tang asaya aliba international asayartem rongnung goal (asaya 150 nung goal 94) timtiba indaktsüba asayar tasembuba lir. Pa Cristiano Ronaldo (asaya 205

nung goal 128) aser Lionel Messi (asaya 180 nung goal 106) na sülen tasembuba jenjang nung lir.

Ano pa ya India nunger asayartem rongnungi linük team tenüing nung timtiba asayaba asayar lir.

Chhetri-i, AIFF Player of the Year naroküm trokben agizükogo aser iba den 2011 küm Arjuna Award aser 2019 küm Padma Shri agizükogo.

International jenjang nung 2008 küm AFC Challenge Cup akokba India team nung Chhetri densema liasü aser iba den 2011 aser 2015 küm SAFF Championship, 2007, 2009 aser 2012 küm Nehru Cup aser 2017 aser 2018 küm Intercontinental Cup akokba team nunga pa densema liasü.

Chhetri international asaya nung taruba ita tatembangbuba asayatsü lia India team tang FIFA World Cup qualifiers Group A nung point 4 ngua tanabuba jenjang nung lir. Parnok Qatar sülen tanabuba jenjang nung lir aser Kuwait pezübuba nung lir.

Phogat-i Olympics atema trials format sangdongtsü mepeshi



Monupii/May 16, 2024
(Agencies): Vinesh Phogat-i Bodhbarnü social media ajanga Wrestling Federation of India (WFI) dang Paris Olympics atema official trials format sangdongtsü mepeshia asüngdangogo.

Phogat, shibai taoba ita Asian Olympic Qualifier nung tetsür 50kg category nung quota ngutetogo, lai shiti ka ajanga wrestler tem tenüngdakba lemsatepa liasü.

Quota angur külem India nunger asayartem nem

tenüingsang agütsüba den lai, "Paris Olympics asayatsü atema ita asem majung dang anunga liaka Wrestling Federation of India-i tang tashi anogo, mapang aser tesem densema official trials format sangdonga mali. Temetetsükaji tanga federation temibo 2023 küm December aser 2024 küm January ita format tejangja den trail inyakyim sangdongatokogo," ta ashi.

Commonwealth aser Asian Games gold medalist yagisa, iba inyakyim nung densema aliba

asayartem nem ken o tejangja metetdaksütsü nüngdakba lemsatepa liasü.

"Kanga dang tongtibng mapang ka nung qualify sür aliba asayartem nem Olympics dak sendakba nung inyakyim tejangja metetdaksütsü kanga dang tongtibng. Osang tejangja agütsüba ajanga tebandang makai tokteptsü atema lenmang lapoktsüba dang masü saka international jenjang nung medal angutsü atema linük jenjang tajungba kümdaktsür. Ni Sports Ministry of India, IOA, Sports Authority of India aser Wrestling Federation of India dang iba ken o ya kanga tongtibangsa agitsü aser trials atema anogo, mapang, tesem aser format officially sangdongtsü mepeshir. Quota angutsü atema asayartemi kanga meranga inyakogo aser parnok nem osang tejangja metetdaksütsü langa lir," ta lai ashi.

Taküm Olympics atema India tsür pongu aser tebur kati quota nguteter lir. Tetsürtem rongnung Vinesh, Antim Panghal, Anshu Malik, Reetika Hooda aser Nisha Dahiya nunger densema lir aser tebur rongnungi Aman Sehrawat-i quota ngutetogo.

Kamal & Batra nati anir India TT team Olympic asayatsü

Monupii/May 16, 2024
(Agencies): Asayar tejen Sharath Kamal aser world No. 24 Manika Batra nati anir India tetsür aser tebur table tennis team Paris Olympics nung asayatsü. India team tang mezüngbuba Olympic team events nung asayatsü lir.

Table Tennis Federation of India lateta tokja aliba guidelines dak ajemdaker senior selection committee-i asayar trok (tetsür asem tebur asem) aser kija asaya nung shilem agitsüpurtem tenüing

sangdongogo.

Tebur team nung Sharath Kamal, Harmeet Desai, aser Manav Thakkar aser tetsür team nung Manika Batra, Sreeja Akula, aser Archana Kamath nunger densema lir.

Section anaprongla nung "Alternate Player" ji G. Sathiyam aser Ayhika Mukherjee na asütsü.

Tebur jika asaya nung Sharath aser Harmeet na asayatsü aser tetsür team nung Manika o Sreeja na asayatsü. Asayartem ya world

rankings dak ajemdaker shimogo.

Arishi küm 41 tain Sharath tang agi Olympics pongububa aser tatembangbuba nung asayatsü lir. Pa mezüng 2004 küm asaya liasü.

India table tennis team: Tebur: A. Sharath Kamal, Harmeet Desai, and Manav Thakkar; Alternate Player: G. Sathiyam.

Tetsür: Manika Batra, Sreeja Akula, and Archana Kamath; Alternate Player: Ayhika Mukherjee.

BENDANGLI OSANG : Tapak 7 nungi...

Israel war cabinet nung telemsa...

Far-right minister temi Gallant dak tenük yok, kechiaser pai jembiba ajanga National Security Minister Itamar Ben-Gvir aser Finance Minister Bezalel Smotrich na mangatetep adoka liasü.

"Minister of Defense-i October 7 nü tamakok ajuru aser maneni tanüa tamakok ajurur. Rara indang nükjidong atongtsü atema iba ama Minister of Defense ya melentsüla," ta Ben-Gvir-i social media post ka nung ashi.

Smotrich-ia, "Kiralongraba atema sempet ama aser Holocaust sülen Hamas-i

Jewish nunger nisung aika tepsetba atema tanü Defense Minister Gallant-i Palestinian terrosist state ka amenoktsü bhukumba sangdong," ta social media X nung zülua liasü.

Netanyahu-i Hamas samatsütsü nangzükaka rara sülen iba telok melena kechi inyaktsü, iba indang nükla tejangja mesayur.

Gaza tarutsü tia mechi mangatetep adokba mechi Israel aser US tsüngta telemsa tali adoker. Israel sentong tejangja ka maliba atema hopta tetenzüklen US Secretary of State Antony Blinken-i aija liasü.

BILEMDANGANG

"Tamakok ajanga mangazükra rajang akümtsü."